

## **Paurongo Korosai Kpebung Yeneac Kibi Ohoec**

<sup>1</sup> Pauro nga Timoteo nerearunac. Anutungo negennenu Yesu Kristoac aposoro anduae nga Timoteo ye negen negensinggoc tosonina. <sup>2</sup> Kpetiac areng nga ngicngac Kristogoc kpeketahema ye negensinggema Korosai taonnu kecdae, kibi yomoc ngenearu faide hade. Anutu Manninango danggunuc ngemmema ruaea ngemmebeso.

<sup>3</sup> Neni ngeneac amma nunumu ua meandimbesoc, Kebunina Yesu Kristo yeac Manggac nga Anutu dangge edeandimbe. <sup>4</sup> Nocac ngeni Yesu Kristoaru kpeketahema ye negensinggema kecma kpetiac areng sasawa heresongogoc hoangyunuandae, ngic yeneng imoc edenunugec bic negening. <sup>5</sup> Ye wiac kurumennu faiu tomaingina fede imoc ngade megecdeac negensinggema kecdae. Nga kurumenggac siduc gombunggac yoac fora <sup>6</sup> ngenearu bic hasikeu negenggec, imocngo bangectoa bangec imohai fingeacyadi amma fora gombunga meficgeude. Nga ngeni Anutuac wosoefacac siriha hentegecma siduc gombung negenggec, imohacnac erekecma yaguc ifingoc ngenearu yadima kecde.

<sup>7-8</sup> Asungo ngenearu ua meu heresongogoc hoangemedae, songo tosonina Epafarango siduc

imoc anemmeec. Epafara ye Anutuac wosoefacac siriha kpoungemmeec amma ye yofinenggac meficngunuma Kristoac kingangkpekpe kecde.

<sup>9</sup> Anu hanahema ngeneac siduc negening, imohacnac ngeneac amma tatahoc numuma kpesi kpesi yofi kpesikecdimbe, Anutungo wiac negenu ngereede, negen negeng imocngo mewakengunuu Asu yengenaoc negen negeng gombunga nga negen negentegec ngemmebeso. <sup>10</sup> Ifi fingeru ngeni Kebuac yoaç hafoangoc modacgec yeng imoc hendacma negengngereede. Nga ngeni ua nga angammenginaac fora gombunga meficgedacma Anutuac negen negenu yadiseri monggoc anggecde. <sup>11</sup> Nga yengena kuc nga kibikperagitoa imocngo meseringunuude. Ifi anu ngeni kuc sasawa mema sogac sogaigoc modzotitia kpac seria yombong kecgecde.

<sup>12</sup> Anutu Manggacngo kpataning arenggac wiac kperagi u faifaia fede, imoc menideac mengerenunuec. Nga ngeni yearu sogac sogaigoc dangge dema kecbisia. <sup>13</sup> Imoc yofiac, kundungngo garennunuudeac uayoac nga kuc mekefec. Mekecmanu Manggacngo imocac kucfunac meicnnuma Songomedahaac eucererenu fainunuec nga nenang yofinenggac ifi kecdimbengoc. <sup>14</sup> Medaha ye donina meu Anutungo kopocsicnina waec. <sup>15</sup> Medac ye Anutu mi hengena yeac siric kefec amma kecde. Kecma wiac sasawa mi fingercmanu ye Anutuarunac kponanga mocgu tohoma fingerc. Fingercma waracdacnina amma kecde. <sup>16</sup> Nga Anutungo Medahaac negensima wiac sasawa yeac anudeac

Medahaarusing wiac sasawa bangecfu nga kurumenga kurumenga manau fedacde, imoc meficgeoc. Yeneac areng yofi, wiac kicngo hengena nga mi hengena amma sawakebangau ngictau tatacnginagoc nga kebuareng kecdae amma ngic yei enara tatac mema kecdae nga ngic gawamang uanina megecdeac uayoacnginagoc kecdae. <sup>17</sup> Nga wiac sasawa mi fingezmanu ye bic kefec amma yeng wiac sasawaac haniatao mocgunoc.

<sup>18</sup> Ye kpebunggac oruha nga kpebungngo yeac forakebanga. Amma ye warac warac tatacfu tarudeac warainemmema homecfunac yacma fingerec. Fingezmanu kpebunggac hanac hanahea kecede. <sup>19</sup> Anutungo yofi negensiu ngereec, “Yeac ubahereau hafoangoc tacbade.” <sup>20</sup> Ye medahaac ifi negemma wiac sasawa bangecfu nga kurumennu fede, imoc Anutugoc uba mocgu anggecdeac medahaac sawa mariponnu maec, imoc mema wiac sasawa imocngo mengereu ruae fingerec.

<sup>21</sup> Anu ngeni warac ubanegen negengnginango Anutuac kuric kecma yeac ngabafora amma angammemengina manganagoc kecgec. <sup>22</sup> Ifi kecma kpetiac nga kpataning amma kopocsicngina kpac anggecdeac yeng mengunuma yeac kicfu faingunuu nanggecdeac negenec. Imoc fingerudeac ye homeec, naso imohaingoc yengena sebiu ngeneac kopocsicac turunga kpouu ruae fingerec. <sup>23</sup> Ngic yeneng warac siduc gombang imoc dekperagigec ngeni nga wiac sasawa Anutungo deu fingezmanu, yeni yoac imoc negenggec. Anu ngeni siduc

gombunggac fora ihai tiserima namma mi wagecdeu ngeni yeac kicfu nanggecde. Nga Pauro neng yoac imocac kingangkpekpe kecbadeac Anutungo meficnuec.

<sup>24-25</sup> Anutungo ua arenga nenec imocac siriha yofi, neng yeac yoac hafoangoc ngenearu dekperagibadeac ua arenga nenec. Nenu yoac imocac kingangkpekpe anai. Nga ngeni Kristoac kpebung yengena forakebanga. Ngeni yeac amma kpendzeng soha mi kpegec. Nga neng meficngunuma ngenec amma neanna sebiu kpendzeng kpeduae. Ifi kpema ubangerec negenduae. <sup>26</sup> Amma siduc gombung dekecduae, imoc warac nasoya nasoya ngicngac areng sasawa keceregec yenearu sufu sufu feec. Ifi feu yofinenggac yengena kpetiac areng kecdae, ngenearu fingectegecde.

<sup>27</sup> Anutungo yoac sufu sufuya feec, imoc kpetiac areng ngenearu dekperagiudeac negenec. Yoac sufu sufuya yofi feec, yeng bangec monnunac ngicngac, yenearu kuc nga kibikperagi homacngoc edzacyunuude. Imoc yofi, Kristongo ubaherenginau kecde nga yeac uaac amma Anutungo kurumennu ngenec kuc nga kibikperagi faiu tomaingina fede. <sup>28</sup> Nga neni ye dekperagiyemmema ngicngac sasawa tembus tembus gorongina kpema negen negentegecgoc yombong yoac edekpou ayemmekecdimbe. Ifi ayemmeni ngicngac tembus tembus yeni Anutuac kicfu Yesu Kristogoc kpeturanggema yadiseri amma nanggecdeac gorongina kpekecdimbe. <sup>29</sup> Gorongina kpeni

Kristo yengena kuctoango nanggenuma meficnumanu uatoa ebiriangoc mema kecduae amma mekecbadengoc.

## 2

<sup>1</sup> Korosai ngicngac ngeni nga Raodikea ngicngac amma sasawango kicmesuna mi negendae, ngeneac nga yeneac amma kpendzeng kpema uatoa mekecduae, ngeni imoc negenggecdeac negenduae. <sup>2</sup> Ni kpebung ngeneac ubaherengina demeseri ambadeac uatoa mekecduae. Ifi amba ngeni ubango hoangemema hafoangoc negen negeng seria megecde. Imocngo finactoa isoc fengemmeu Anutuac yoc sufufuya negentegecyombonggecde. Amma yeac yoc sufufuya imoc Kristonoc. <sup>3</sup> Yearunoc negen negentegec nga negen negenggac finactoa sasawa sufufuya fede. <sup>4</sup> Nga ngic mongngo ikocyoc dema tobangngunuma uba mesufu angemmebauac kibi yomoc ohongemmeduae. <sup>5</sup> Ni sebingo ngenigoc mi kecduae, fora. Nga ongaasuu ine ngenigoc kecma yofi negenduae, ngeni Kristoaru kpeketahema ye seria negensinggema kekecngina gombunga arenggekecdae. Ifi ngenemma sogaiduae.

<sup>6</sup> Ngeni Yesu Kristo Kebungina mema ubaherenginau faima hoanggegec, imocac sirihau ngeni ye modacma kecbisia. <sup>7</sup> Amma ngeni yearu godongina seria mema yadiseri ambisia. Nga yoc edekpou angemmeing, imocngo negen negensingngina meseriu nambisia. Nga ngenearu dedengerec ebiriangoc febeso.

<sup>8</sup> Ngic mongngo ngicdede dema ikocfu wangecngunubauac ngeni henghomema

kecbisia. Negen negeng ifia, imoc Kristo arunac kpac. Imoc esangabofocngina yene arunac bangectoa bangec, imocac hadehadegoc meficgegec. <sup>9</sup> Imoc yofiac, Kristo yengena sebiu Anutu yengena kekeha hafaogoc fekecde. <sup>10</sup> Kristo ye sawau nga bangecfu enarameme nga kucnginagoc kecdae, yeneac oruha. Nga ngeni yegoc kpeketahema kecmagec yeng mewakengunuude. <sup>11</sup> Anu ngeni yegoc kpeketahema kecgec ngenearu herec herecgeac faka fingerec.\* Ua imoc ngic mariu monggo mi meec, kpac. Kristongo herec herecge ua imoc mema ubangina esea herecgema hesima ukuec. <sup>12</sup> Ukuu Anutungo dokunadzicfu Kristogoc tonggongunuec. Nga Antungo Kristo homecfunac megboriec. Anutungo ua kuhagoc meande, ngeneng imoc negensinggegec yeng sing imohai ngeni ifingoc Kristogoc megboringunuec.

<sup>13</sup> Anu ngeni warac homemea kecma uba eseangina mi herec herecgea Anutuac yoc kpekecma singa ferahegec. Nga yeng Kristogoc megboringunuma yoackpekpengina sasawa wangemmedacma monggoc mi negensiec. <sup>14</sup> Kopocsicac kibi mong oho ohoya feec, imocngo manganangina heficgenemmeec nga Kristongo kibi imocnoc biringngo mariponnu kpeu nanec. Ye ifi anu yoc kibi oho ohoya feec, imoc meickema dzuacdarec. <sup>15</sup> Amma ye yengenaoc mariponnu nanec, imohaingoc sawau me bangecfu enarameme nga kucnginagoc kecdae,

---

\* **2:11:** Yuda yeni sebi tosangina herecgegec. Paurongo faka imoc negensima yoc heima deec.

yeneac dzikacac wiacngina hesiyemmedaru eng didiu nanggec.

<sup>16</sup> Imocac amma ngic mongngo nenedokungina siriha amma tacnegeng nasotoa me sabatanaso me afo gboria made, naso imohai dafi tacandae, yeni naric mi isingngunuma demanganengunubisia. <sup>17</sup> Wiac imoc sasawa, imoc wiac ngade fingerude, imocac ongaonga nga Kristongo wiac fora ande. <sup>18</sup> Nga goa yeni kpefing hania hania hengkecma ikocfu memaemema angero dengereyunuandae, yeneng firanggac iraga mebauac yeneac yocac mi modacbesena. Ngic ifia yeni ubangina eseaac negen negeng sicsauc modacma eng yenanggac negenggec wiac engena angkecede amma yoackpekpegoc kecdae. <sup>19</sup> Areng ifia yeni kpebunggac oruha Kristo wama kecandae. Yearunac sic ginonnina mama sebinina kpeturanggema nanggeande. Ifi anu Anutuarunac yadi yadi mekecdimbe.

<sup>20</sup> Anu ngeni Kristogoc homema bangectoa bangec imocac hadehade bic wagec ifi isoc andeu, ngeni bangecac ngicngac siricfu yeneac bageu mong mi kecbisia, kpac. <sup>21</sup> Ge imoc mi mebesena nga imoc mi nebesena amma imoc mi kpeserebesena, ifi degec mi ngereeude. <sup>22</sup> Imoc ngicac dede nga ngicac negen negengsac nga wiac imoc ngeneng menec amma mekecgec kpac anudeac faifaia. <sup>23</sup> Anu ngic ifia yeni yenaoc deandae, “Yoacnina imoc negen negentegecgoc.” Yeni ifi dema yenaoc miti arengngina meficgeemema yegec nunumu nga memaemema faka ikoha modacma wiac hania haniaac segekecma ngicngac warecyunugecdeac

sebingina memanganeandae. Nga faka ifiango fora mong mi meficgeude, kpac. Imoc uba eseaac negen negeng hania meseriude.

### 3

<sup>1</sup> Ngeni Yesugoc homecfunac momoc gborima yacgec, ifi dema wiac wi fede, imocac angemebesos. Kristongo imohai Anutuac foiau tacde.

<sup>2</sup> Ngeni wiac wi fede, imocac negensima kecma bangecfu wiac fede, imocac ine mi negensibisia.

<sup>3</sup> Ngeni bic Kristogoc homegec kekecngina yegoc Anutuaru sufuu, ngeni yeac hoannu kecdae.

<sup>4</sup> Kristo ye kekecnginaac hania. Yeng fingectegeru, naso imohai ngeneng yegoc yeac kuc nga kibikperagiau ngenahafoc fingectegecgecde.

<sup>5</sup> Imocac ngeni bangecac songo hania hania herenginaw fengemmede, imoc wagec homebesos. Faka imoc yofia, kaisero nga songo ikoha amma faka seuhagoc nga faka mangana amma kichodung. Kichodung imocngonoc nemuac afec afehe faka ande.

<sup>6</sup> Nga ngicngac yeneng faka mangana ifia sasawa mekecma Anutuac yoc kpegec yeng imocac turunga kpouyemmeude.

<sup>7</sup> Ngeni warac yenigoc kecma faka ifia homac angkecgec. <sup>8</sup> Amma ngeni yaguc herebu nga faka gereagoc amma ngaba imoc wabisia. Nga desureyoac amma tenicfagoc imoc enacnginaunac mi ereudeac garengemebisia.

<sup>9</sup> Ngeni ikoc mi angemebisia nocac ngeni ubasebingina esea angammemeagoc bic hesima wagec.

<sup>10</sup> Ngeni imoc wama ubasebingina gboria heima mekecdae. Nga Anutungo ubasebingina gboria



meficgema monggoc heigborima negen negen-tegec foragoc faingemmeu imoc yengena siric anude. <sup>11</sup> Ifi heigboringunuu ngeni griknigic me yudangic andae, imocac dede kpac ande. Nga ngeni sebi tosangina herec herecgea me sebi tosangina mi herec herecgea nga ngeni griknigic arennu mi torokpedae me bangec hereaunac ifi yombong kecdae me ngeni ngicngac wanaha mingingnginagoc kecdae me witiha kpac kecdae, imocac mi dedimbe, Kristongo ngicngac ngeniac ubahereu hafoangoc kefudeu, imocngo wiac fora ande.

<sup>12</sup> Anutungo heresongogoc hoangngunuma meisingngunuu yeac kpataning areng kecdaeac ngeni ubaherenginango ngicngac yeneac ubamangang negemma wosoefac ayemmebisia. Amma memaemema yumea kecma ngicngac ogofocngina yeneac modzongina mi tibeso. Ngeni faka imoc sasawa wamba isoc heigec kemeu mekecbisia. <sup>13</sup> Amma ngeni ngicngac ogofocngina yeneac modzongina mi tiu kopocsicngina waemmebisia. Kebungo ngeniac kopocsic bic wangemmeec, ifi isoc ngic mongngo ngic monggac yoac mekecdeu kopocsicngina waemmekecbisia.

<sup>14</sup> Anu ngeni imoc sasawa angkecma heresongogoc hoangemema kecbisia. Ifi kecgec heresongongo witic isoc amma dzegengunuu ngeni yadiseri hafoa mocgu amma kecgecde. <sup>15</sup> Ifi kecmagec Kristoac ruaengo herengina garenggebeso. Ngeni ifi anggecdeac yeng bic kpacngunuec. Ifi anu ngeni ruaegoc sebi mocgu amma dangge dema kecbisia.

<sup>16</sup> Kristoac yoacngo ubaherengina mewakebeso. Nga negen negentegecgoc edekpou angemema gorongina kpeemebisia. Nga Mitiyegecfu yegec fede nga uba furiau yegec amma Tiri Asungo yegec heficgengemme kecede, ngeni imoc ubangerecgoc Anutu heimibisia. <sup>17</sup> Ngeni wiac sasawa degecede me anggecede, ngeni imoc Kebu Yesuac kpacfu ambisia. Amma ngeni ye negensima Manggac ubangerec edebisia.

<sup>18</sup> Ngac, ngeni ewefocngina yeneac yoac tofohobisia, nocac Kebuac dedeu faka imocngo naric anude. <sup>19</sup> Ngic, ngeni enengfocngina heresongogoc hoangyunubisia nga modzotiti me ngaba mong mi meficgeyemmebisia. <sup>20</sup> Nambarac, ngeni wiac sasawa negemma nonggo mangfocngina yeneac enac tofohodacbisia. Kebungo faka ifia negenu ngereeude. <sup>21</sup> Nambarac yeni mangfocngina yeneac modzongina tiu ihoc bahoc ambauac manggac ngeni wosomeme yoac mi ayemmebisia.

<sup>22</sup> Ngic wanac kecdac, ngeneac mingingfocngina yeneng imoc me imoc degec ngeni yoacngina negemma hafoangoc modacbisia. Yeni ubangerec negenggecdeac yeneac kicfusac enac tofoc tofoho mi ambisia. Ngeni uau ubangina suema Kebu eweheimima uangina mekecbisia. <sup>23</sup> Amma ua imoc me imoc megecede, imohai ubangina suebisia. Ngeni imoc ngic yeneac amma mi mebisia, kpac. Ngeni Kebuac negemma uangina mebisia. <sup>24</sup> Ifi megec Kebungo turunga kpoungemmema maridzominga ngemmeude. Nga Kristongo ngenac mingingngina nga ngeni yeac uanoc mekec-

dae. <sup>25</sup> Kebu ye monde mondea kpac. Imocac ngic mongngo faka angammeme mangana mekefu Kebungo imocac sirihau turunga miude.

## 4

<sup>1</sup> Ngeni yofi bic negendae, ngeneac ngic kunengngo wi kurumennu kecde. Imocac ngic ngeni wanac areng mingina kecdae, ngeni ua arengfocngina faka dindingacfu nga sirihau ayemmekecbisia.

<sup>2</sup> Anu ngeni nunumu uau serima ubagbori kecma dengerebisia. <sup>3</sup> Ngeni neneac ifingoc negemma yofi numubisia: Anutungo yoacac nagu menemmeu Kristoac negen negeng sufu sufuya fede, imoc dekperagini negembisia. Yoac imocac-noc witicamau kecduae. <sup>4</sup> Yoac imoc didiu faima yoac sirihau dekperagibadeac numubisia.

<sup>5</sup> Ngeni ngicngac ngadeau kecdae, yeneac botucfu negen negentegecgoc kecma Kebuac sing edzacyunugecdeac nasongina mi ukubisia. <sup>6</sup> Nga ngeni nasosoc ngicngac tembuc tembuc yeneac yoac turunga dafi merengyemmegec negenggecdeac amma yoacnginango wosoefacgoc kondunggac songo angkecde, ifi isoc ambeso.

<sup>7</sup> Nga neac yoacsiduc, imoc Tikikongo angemmedarude. Ni heresongogoc hoanggekecduae nga ye modzotitia kpac Kebuac enac tofohoma kecde. Kebu ye minginnina anu yegoc nenahafoc kpeketahema yead wanac areng amma momoc kecdimbe. <sup>8</sup> Yennoc neni kecdimbe imocac sirihau edengunuudeac nga ngeni ubaherengina meseriudeac sueba hangemmede.

<sup>9</sup> Anu yegoc ngeneac amamocgungina mong, Onesimo, sueni haecde. Onesimo ye uayaac goiya heiande, amma ye heresongogoc hoanggema kecdimbe. Nga yereng faka yei fingerec, imocac siduc angemmedarecde.

<sup>10</sup> Nga Aristako ye nigoc witicamau taric, yeng ngeneac wenacngerec deu hade. Nga Mareko, Banabaac nebera yeng ifingoc wenacngerec dede. Ngeni yeac dedekperagiyoac bic megec, yeng ngenearu haude isoc ubangerecgoc ama heim-ibisia. <sup>11</sup> Amma Yesu, kpara mong Yusto, ye wenacngerec deu hade. Ngic harebec imoc yenengsac sebi tosangina herec herecgeaac aren-nunacngo meficnuma Anutuac eucererenggac ua nenahafoc mekecdimbe. Yeneng meserinuma kecgoc amma kecdaengoc.

<sup>12</sup> Kristoac wanacngic Epafara, ye ngeneac arenunacnoc, yeac wenacngerecngo ngenearu hade. Amma ngeneng yadiseri amma nanggecdeac nga Anutuac negen negeng nga songo sasawa ireckema imohai hafoangoc kecgocdeac, ye ifi negemma ngeneac amma nasosoc nunumu ua ebiriangoc mekecde. <sup>13</sup> Ye ngeni nga Raodikea ngicngac amma Hierapori ngicngac ngeneac amma uatoa mekecde, imocac hepuc amma edengunuduae. <sup>14</sup> Nga Ruka, dota heresongogoc hoanggedimbe, ye nga Dema, yereng wenacngerecngira ifingoc faiec ngenearu hade. <sup>15</sup> Amma Nimfa nga kpebung yeac amau kpedzucneandae nga Raodikea taonnunac tosofocna yenearu wenacngerecnina faini hade.

<sup>16</sup> Anu ngeni kibi yomoc garenggema osoma faigec Raodikea kpebung, yenearu kenu yeneng

hemma osobisia. Amma neac kibi Raodikeanac haude siriha imocngoc yombong osobisia. <sup>17</sup> Nga Arkipo yofi edebisia, “Kebungo ua bic genec, ge ua imoc hafoangoc modacma mekechesena.”

<sup>18</sup> Anu Pauro ni wenacngerecna yomoc neanna maringo ohongemmeduae. Nga witicamaungoc tacduaeac neac negensibisia. Kebuac danggunucngo ngenearu febeso.

**Yoac kekehagocac Dzadzahac gboria nga  
Mitiyegec  
The New Testament and Psalms in the Dedua  
Language of Papua New Guinea  
Buk Baibel long tokples Dedua long Niugini**

copyright © 2005 Wycliffe Bible Translators, Inc.

© 2012 Wycliffe Bible Translators, Inc.

Language: Dedua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 21 Feb 2024 from source files dated 31 Aug 2023

19b7c48c-f4ce-5007-838d-58f01dc01ecc